

शिवायि नमः ओम



जवाहर लाल "सरूर"

(यम्यु कित्ताबि हँन्दि सॉरी होकूक
छे सूरज बट्टनि नावु मँहफूज)

कित्ताबि हुन्द नाव : शिवायि नमः ओम
शॉयिर : जवाहर लाल "सरूर"
छपन वॅरी : 2002 ई.
तेदाद : 300
म्वल : 30 र्वपयि
देव नागरी लिपि अंत्रन : "मसरूफ"
कंप्यूटर डी.टी.पी : "रिंकू कौल" (IILS Center)
9419136369 (R)

मेलनुक पता :

1. स्वामी मस्त बब
अश्रम पटोली, जम्मू
2. सूरज बट्ट
विनायक नॅगर, मुठी
3. नागराद अदबी संगम जम्मू

कलमस प्यठ पछ

काँशिर लीला छे अकी वख्त, अँकिसुय मूडस मंज, अकी अनमानु, यथ अँस्य सगुन तु निरगुन बँख्ती वनान छि, तिमन द्वशवुन्य क्वम करान। अथ मंज छि बँखुत्य संज व्यनथ तु आँरचर ति आसान तु आरादि दिवताहस छु दीवियि सृत्य म्युल गछनुक व्वलसुन ति आसान। काँशुर शॉयिर छु पतुवथ यिमन द्वशवुन्य बजॉहिर अलग नँहजन अँक्यसुय शाहस मंज प्रकट करान आमुत। वनव जि अँज्युक बँखुत्य छु ब्रूठिमि ख्वतु ज्यादु खुल नजर थावान तु तस निश छिनु बँख्ति यि हुंघ रंग मोहदूद ति कयाजि तजरुब छुसनु मोहदूद। मगर यीचुय छनु हँकीकथ। यि प्रव्रथ छे परमानंदस तु कृष्ण जुवस मंज ति मूजूद। यि छे काँशिरि लीला शॉयिरी हुंज फेरुहाव खसूसियथ तु यि छे “जवाहर लाल सरूरस” मंज ति बाजॉबतु मूजूद। सरूरस वोत वारियाह काल लेखान। हाल हालुय ‘वजुद’ नाव्य शारु सौंबरन कँडिथ द्युत अँम्य पनुनि बालेंग स्वद ब्वदि हुंद परिचय तु यलि लीला कोहनु मशुक (अब्यस्त) शॉयिरस अथि लगान छे तथ मंज छि वारियाह संबावनायि (इमकानात) पॉदु गछान। यिम लीलायि ति छ यिछन संबावनायन कुन इशारु करान। यि ति छु बासान जि यिम शार छिनु

सिरिफ प्रथापालन खॉतरय लेखनु आमुत्य बँल्यकि बाजे छि यिम शॉयिरु सुंद तजरुबु ति बावान। बँख्ती ह्यु प्रोन ति तु सदाबहार ति बाव या बावना तजरुबु बन्य तु पतु मुनाँसिब ज़बान रटुन्य छे स्यठाह बँड कथ ति तु मुशिकल ति। परन वॉल्य ह्यकन यि पानय वुछिथ जि सरूर छा त्युथुय बँखुत्य ति युथ शॉयिर छु। मे छि अँम्य सुंदिस कलमस प्यठ पछ।

यि ति छे खोशी हुंज कथ जि यिम शार छि नागरी तु नस्तालीक द्वशवुन्य लिपियन मंज छापनु आमुत्य। नागरीयस मुतलिक सपुद्य पँत्यम्यन दँहन वँरियन चुक्यदर व्यदवानन हुंघ वारयाह बैठाक तु आँखरस यिमन निशानन आँखरी शकल दिनु आयि तु यिम व्वन्य कंप्यूटरस प्यठ अलग काँशिरि फांटु रँग्य दँस्ययाब छि तिमय छि यथ मंज इस्तिमाल सपदेमुत्य, यि छे ब्याख खोशी। यिम निशानु छि सँहल तु वरतावस लायख तु भारत सरकारन मंजूर कॅर्यमुत्य। निशानु छि यिथु पॉट्यः—
विशिष्ट कश्मीरी ध्वनियाँ और चिह्न

अँ	:	अँछ, चँज (भागाई), अँड (आधी)
आँ	:	आँल, बगॉर (बगैर) काँर (गरदन)
अु	:	तु (और) चु (तुम) बतु (भात)
अु	:	तुर (सरदी) कृत्य (कितने)
ओ	:	ओदुर (गीला) मोट (मोटा) कोत (कहाँ)
अ्य	:	ख्यन (खाना) द्यन (दिन) ब्यल(बेलपत्ता)

पनुन्य कथ

अव : क्वछ (गोदी) दवद (दूध) ब्वन (नीचे)
—य : तीन्य (उतने) सॉन्य (हमारे)
गॉर्य (सिंघाड़े)
अे : मे (मुझे) खे (खाओ)

बाकय हिंदियिक्य स्वर छि बदस्तूर तिथय कॅन्य
इस्तेमाल सपदान। मगर हिंदियिक्य महाप्राण तु कॅह
सयुक्त अछर छि सिरिफ नावन मंज इस्तिमाल सपदान।
मसलन:

भूशणलाल (बूशन नु) झारखंड (जारखंड नु)
लक्ष्मण (लॅख्यमन नु) ज्ञानेश्वर (ग्यानेश्वर नु)

सुभाशनगर

रतनलाल शान्त

20 अक्टूबर 2002

इनसान छु प्रथ मरहलस प्यठ नव्यन सिरन ठानु
यछान तुलन तु पानु ज्ञाननुच यछा छस चिह पतु चिह
गनान। खासकर यलि इनसान संतन सादन हुंदिस असरस
तल यियि। मे ति गन्यव युथ राग मनस मंज यलि मे स्वामी
मस्त बबस सुत्य व्वथु बेठ लॅज। यि अँन्द्रून छांडनुच व्वठ छांठ
छे न्यरल तु छांडन वोल छु द्वह ख्वतु द्वह नॅव्य तजरुब करान
तु छस नव्यन सरहदन हुंज निशानदिही सपदान! चूँकि
परमात्माहन छे ज्यव अता कॅरमुच तु ल्यहजा द्युत मे ति
अन्दर आतमाहस मंज सपदान वाल्यन पारुद्य त्रायन लफज्ज
जुव ज्युतु दिथ जायुन! व्वन्य छुस बु तवय पनुन अँन्द्रून यथ
ल्वकचि किताबि मंज व्यछनॉविथ त्वहि अर्पन करान!

अथ मंज छुनु कांह शख जि बॅहलि पायि गुलोकार
श्री राम कृष्ण किचलू सॉबन वातनावि यिमव लीलायव
मंजु कॅह लीलायि ब्रॉंटुय त्वहि ताम तु यिमन सपुद मकबूलि
आम हॉसिल अवु बापत छुस बु अँमिस गलूकारु सुन्द
शुकुर गुजार! सुती छुस बु रतनलाल “शान्त” सॉबुन ति
शुकरिया अदा करान यिमव यथ ग्वडु कथ लीछ! ब छुस
मखन लाल “कवल” सॉबुन तु रतन लाल “जौहर” सॉबुन
शुकुर गुजार यिमव यथ किताबि तरतीब दिनस मंज मे
मदद कोर !

जवाहर लाल “सरूर”

पनुनिस टॉठिस ग्वरस
'मस्त बबनि' नावु

जॉरी

तर्यतव सॉरी गणपतयार
आदि दीवस करव ज़ारु तु पार
दयवु यथ बवसरसुय लागि तार
आदि दीवस करव ज़ारु तु पार
पछि चानि लारान आय सॉरी
कन थाव बोज़ सॉन्य विलु ज़ारी
दितु दितु बॅखत्यन दितु शेहजार
आदि दीवस करव ज़ारु तु पार
पॉपी आमृत्य अँस्य र्शण छी
डेडि तल पेमुत्य च़ै परन छी
नारस दयवु बनि असि गुलज़ार
आदि दीवस करव ज़ारु तु पार
टोठक यस च़ुय तस क्या गम
गछि क्या चानि बारगाहे कम
छी पथर पेमुत्य यी तनय आर
आदि दीवस करव ज़ारु तु पार
च़ेय रोस बोज़ि कुस कुस थावि कन
सनम्वख च़ुय छुख श्यन तरफन
गॅन्यशिबलु खारोय पोशु अंबार
आदि दीवस करव ज़ारु तु पार

गणपत जियस कुन

असि चॉन्य आशा असि चॉन्य कल
च्युय कर सान्यन मुशकिलन हल
लारुक्य लॅग्यमुत्य अँस्य अज़ दार
आदि दीवस करव ज़ारु तु पार
स्यँदुरा मॅल्यथुय छुख शूबान
च़ेय कुन वुछ थुय मन लूबान
अथु रोट करतु छी अँस्य लाचार
आदि दीवस करव ज़ारु तु पार
कंद नाबद बॅर्य बॅर्य अज़ थाल
आमुत्य अँस्य छी वुछ सोन हाल
न्यँतरन लॅजमुच़ असि छय दार
आदि दीवस करव ज़ारु तु पार
दशुन दितु अज़ च्युय "सरूरस"
आश छस चॉनी छुय बेबस
ध्यान चोन छुय करान बारमबार
आदि दीवस करव ज़ारु तु पार



पॉर्य पॉर्य लगु ना गणपत नावस
बावस पनुनुय हाल
यियि ना पतु बुति कॉल्य मा रावस
बावस पनुनुय हाल
गँन्यशि बलु प्रारान लोल छुम आमुत
गणपतयार आस्या
डेंशन बुति कर यी छुम हावस
बावस पनुनुय हाल
ओश छुस हारान च़ाले च़ाले
बुय ज़ानु क्या गुदर्योम
परु छ्योन लोगमुत छुस आमतावस
बावस पनुनुय हाल
रंगु रंगु रंग क्या यथ समसारस
रंगनय आव म्योन पान
पादन तल व्वन्य सर बो त्रावस
बावस पनुनुय हाल
स्यँदुरा मॅल्यथुय हेरिब्वनु पानस
करि ना सोनुय पाय
खीर खंड थाल बो बॅर्य बॅर्य थावस
बावस पनुनुय हाल

गणपत जियस जय जय कार

वथरुन त्रावस पोशि अंबार
गणपत जीसुय जय जय कार
गॅन्यशि बलुछा किनु गनपतयार
गणपत जीसुय जय जय कार
उमायि हुन्द छुख टोठ सनतान
पदवी थॅज छय थोद चोन थान
अन्दु अन्दु प्रथ अन्दु मुशकन्यदार
गणपत जीसुय जय जय कार
अॅस्य शरन आमुत्य छी डेडितल
मनि मंज ललवान चॉनी कल
दरशानु चानि बनि असि व्यसतार
गणपत जीसुय जय जय कार
नजरा करतम युथ फ्वलि मन
जान पान कोरमय चैय अर्पण
टोठतम चु तु गछि बख बेदार
गणपत जीसुय जय जय कार
आशि सान अज सररु शरनुय आव
यछि पछि दरबार चोनुय चाव
दरशानु चानि बनि बवसर तार
गणपत जीसुय जय जय कार

मस्त बबस डॉल्य

टुकरुकि लालय स्वामी नंदलालय
अज यितु सालय छम चॉन्य माय
दूर्यर चोनुय कोता चालय
अज यितु सालय छम चॉन्य माय
हृदयस मंज छम चॉनी मालय
छुस बेहालय हाव दर्शुन
ख्यावथ बॅर्य बॅर्य खीरु खंडु थालय
अज यितु सालय छम चॉन्य माय
अज ताम कौत्या दित्यमय नालय
मन प्रान आलय चैय पादन
प्रेमुक्य रॅतुन दीप आश्रमु जालय
अज यितु सालय छम चॉन्य माय
मस्त बब चोनुय माहि मिसालय
मारान छालय दीवन मंज
टोठतम तिथयकॅन्य हा रक्षिपालय
अज यितु सालय छम चॉन्य माय
क्रालु बब ह्यू छुम वुछमुत खालय
बुति हो पालय तॅम्य सुंज रीथ
सीवा बावय प्रोवुन कृपालय
अज यितु सालय छम चॉन्य माय

मूख्य गव विभीशण बैयि शाम लालय
तिहुंदुय सवालय छुय मैति टोट
दयि वति लागुम म्वकलि जंजालय
अज यितु सालय छम चॉन्य माय
बबु म्यानि वनतम कोता चालय
बवसरु डालय छम डालान
इन्द्रेय चूरस ठोर कर कालय
अज यितु सालय छम चॉन्य माय
ऑरचर "सरूर" छुय करान हा लालय
बु अलम खालय शूबायि सान
गटि गाशुर कर चठ मुंह जालय
अज यितु सालय छम चॉन्य माय



पंपोशि पादन दिमहोय मीढ्य

यिनु चानि वुजन्त्या लगि नागरादन
पमपोश पादन दिमहोय मीढ्य
मन छुम चंचल कन थाव नादन
पमपोश पादन दिमहोय मीढ्य
परु छ्योन करु क्या बरन्धन छि तॉरी
अटि छिम पापुन्य बॉर्यये
यितु दितु दर्शुन द्यवु फ्वलिह्यम मन
पमपोश पादन दिमहोय मीढ्य
दीवी तु दीवता दर्शनस प्रारान
वतु चानि गारान गारान आय
अभिलाश चोनुय संतन तु सादन
पमपोश पादन दिमहोय मीढ्य
ब्यल तय मादल चॉर्य चॉर्य लागय
नागयबलु अँस्य प्रारान छी
सूर मति कन थाव च्युय फँर्य यादन
पमपोश पादन दिमहोय मीढ्य
नख्रु डख्रु च्युय छुख च्युय र्सवव्यॉपी
त्रिजगथ पाल छुख व्यनती बोज
होश दिम लगयो छम चॉन्य लादन
पमपोश पादन दिमहोय मीढ्य
भावनायि बौरमुत मन अज "सरूरस"
चैय रोस कुस करि तस व्यपकार
च्युय छुख यिवनय च्युय छुख आदन
पमपोश पादन दिमहोय मीढ्य

शंभू

छम वसान अशिची दार शम्भू
यीतनय यीतनय आर शम्भू
मनि मंज छुम वुहान नार शम्भू
यीतनय यीतनय आर शम्भू
काँलास पर्वत छुख आसान
द्वख दौदय बैखत्यन छुख कासान
बोज़ बोज़ बोज़ म्यौन्य ज़ार शंभू
यीतनय यीतनय आर शम्भू
पाप शाफ कासतम बास सनम्वख
रोज़तम साहितस कासतम द्वख
गोब छुम गोमुत बार शंभू
यीतनय यीतनय आर शम्भू
खिरु खंडु थाल ह्यथ छुस प्रारान
मनि मंज राथ दवह चुय गारान
मेति दितु बवसरु तार शंभू
यीतनय यीतनय आर शम्भू
टोठतम चुति अज युथ फ्वलि मन
जू जान करुहय च़ेय अरपण
कलि चानि छुस बेमार शंभू
यीतनय यीतनय आर शम्भू

जगतस गटि मंज चुय हाव गाश
प्रथ विजि असि वन्य चॉनी आश
जायि गोम लोव ल्वकचार शंभू
यीतनय यीतनय आर शम्भू
पाठ तय पूजा छुस नु ज़ानान
पनुन्य नामु सुम्रन दितमो दान
शिवयि नमः ओम सार शंभू
यीतनय यीतनय आर शम्भू
कंद नाबद तय बादाम खौल्य
यछि पछि आमुत ह्यथ छुस डौल्य
छुस बु "सरुर" लाचार शंभू
यीतनय यीतनय आर शम्भू



हावस छुम

शिव शंकरसुय लगुहा नावसु
दियि ना दर्शुन हावस छुम
पादन तल बो पान वथरावस
दियि ना दर्शुन हावस छुम
छ्वन्य छ्वन्य करवुन र्वनि ग्वसोन्या
अलख निरंजन बोलान आव
आयतन पननुय जुव जान थावस
दियि ना दर्शुन हावस छुम
लारान आमृत्य बँखुत्य छि सॉरी
हलमन बँर्य बँर्य छिख पमपोश
वावजन प्रुछ पय चोनुय वावस
दियि ना दर्शुन हावस छुम
बँर्य बँर्य शिनु बाल बैयि वन थॉविन
कम कम रूप असि हावान रूद
बँगी तु चरसी गॉमत्य अज मस
दियि ना दर्शुन हावस छुम
जगतुक रखिपाल असि करि रख्या
राथ द्वह असि बस तँहंजुय आश
समयन लॉगयमुत्य अँस्य अज दावस
दियि ना दर्शुन हावस छुम

कॉलास क्वहकिस अमरनाथस
अमरा वँती छस छलान पाद
पॉर्य पॉर्य लगुहस अथ चिकु चावस
दियि ना दर्शुन हावस छुम
हँर्यश्वर बिहिथ मंज ग्वफाये
सॉरी छिस करान जय जय कार
"सरूर" मोत अज तँहंदिस नावस
दियि ना दर्शुन हावस छुम



शिव नाथ

पादन लगुहय पॉरी

शिवनाथ बोज़ सॉन्य जॉरी
बॅर्य बॅर्य असि अॅश टॉरी

शिवनाथ बोज़ सॉन्य जॉरी
सैदि बुथि असिकर नज़रा

कर्मस युथ बनि स्यज़रा
बरन्यन वॅथ्य त्राव तॉरी

शिवनाथ बोज़ सॉन्य जॉरी
सरफु मालु छय च़े नॉली

फ़ेरान छुख बॉल्य बॉली
शीशु नागु प्रारान सॉरी

शिवनाथ बोज़ सॉन्य जॉरी
वासुक छुय च़े शूबान

जटि मंज़ गंगा लूबान
छय वसान अम्रयथ धॉरी

शिवनाथ बोज़ सॉन्य जॉरी
हरम्बख वॅन्य अॅस्य दिमहोय

वावजन ज़ागा ह्यमहोय
न्यंतरन खून असि जॉरी

शिवनाथ बोज़ सॉन्य जॉरी

अशि वानि पाद अॅस्य छलहोय

दरशनु चानि अॅस्य बलहोय
यियि कर व्वन्य असि वॉरी

शिवनाथ बोज़ सॉन्य जॉरी
वनु वॉस्य ह्यनु अॅस्य आमृत्य

अजि रॉच अॅस्य गरि द्रामृत्य
अटि असि पापुन्य बॉरी

शिवनाथ बोज़ सॉन्य जॉरी
"सरूर" शरन छु आमृत

आशि चानि गरि अज़ द्रामृत
कासुस च़ुय लाचॉरी

शिवनाथ बोज़ सॉन्य जॉरी



मति गोसाने

कति छारथ हा नुन्दु बाने
सोन यिखना मति गोसाने
बु हा बलयो दरशानु चाने
सोन यिखना मति गोसाने
पाद लूसिम छारान छारान
अशि कनि छस बो खून हारान
क्या ल्यूखतम अजलय लाने
सोन यिखना मति गोसाने
जटि गंगा हटि छुय वासुक
शिनु बालन मंज बाग कति छुख
यि चु ज्ञानख ति कुसू ज्ञाने
सोन यिखना मति गोसाने
मतु रोशतम शिव मतु त्रावतम
सनम्वख चुय दर्शन हावतम
नतु शीन तापु गलु दानि दाने
सोन यिखना मति गोसाने
हर म्वखके हा हॅरी हरो
चूरि ब्यूठहम हा जटा दारो
पॉर्य लगयो शंकरु म्याने
सोन यिखना मति गोसाने
पूशिन आश चॉन्य "सरूरस"
गोमुत च़ेय रोस छुय बेबस
हारान ओश ज़न रूदु श्रोने
सोन यिखना मति गोसाने

नमस्कार

बावु गौरुम चंदन हार
शीव जियस नमसकार
पोशि हलम मुशकिदार
शीव जियस नमसकार
साद संत सॅमिथ आय
चंदन वारि रॅटुख जाय
गाह छि छटान क्वहसार
शीव जियस नमसकार
विगनि ग्यवान शोक सान
यिमन लॅजमुच़ मान मान
व्वलसिथ आयि आबशार
शीव जियस नमसकार
छँडिथ आयि क्वह तु बाल
बॅरिथ खीर खंडय थाल
तंदलि थॉविम शूबिदार
शीव जियस नमसकार
ग्यवान ल्यॅदुर वज़ान साज़
मॅदुर मीठ छस आवाज़
कनन गछान बार बार
शीव जियस नमसकार
"सरूरस" छे चॉनी आश
अॅछन हुन्द बु वन्दय गाश
फौलिथ आयि लालुज़ार
शीव जियस नमसकार

दितु दर्शुन

अशि वानि पाद छलुयो
दितु दर्शुन बलुयो
तनि कोफूर मलुयो
दितु दर्शुन बलुयो
हरम्बखु ज़ागि रोज़य
डालि हो ग्रावु सोज़य
यिख नतु शीन गलुयो
दितु दर्शुन बलुयो
बँखत्यन छे चॉन्य आशा
गटि मंज़ हाव गाशा
बागस ही फ़वलुयो
दितु दर्शुन बलुयो
गाह छोट संगर मालव
ग्रज़ तुल पांचालव
यितु अँतलास वलुयो
दितु दर्शुन बलुयो
सिरयि चँन्द्रम च़े प्रारान
जायि जायि छी गारान
वादस ना बु डलुयो
दितु दर्शुन बलुयो
आमुत र्शण छुय "सरूर"
आशा करतस पूर
नतु कोसतूर कलुयो
दितु दर्शुन बलुयो

सोन कर पाये

अँस्य छि आमृत्य चाने माये
मॉज शारिकॉय सोन कर पाये
गरि द्रामृत्य चाने राये
मॉज शारिकॉय सोन कर पाये
त्रन भवनन च़ु छखय फेरान
चँक्रीशर सॉरी प्रारान
असि पूशिन चोनुय साये
मॉज शारिकॉय सोन कर पाये
मीठय पादन च़े दिमय यिखना
अँस्य छि क्रेशान दर्शुन दिखना
व्यनु पम्पोश लागु पूज़ाये
मॉज शारिकॉय सोन कर पाये
पाद लूसिम छारान छारान
वाँस सूरुम प्रारान प्रारान
दूरि रूज़ुहम च़ूरि कथ शाये
मॉज शारिकॉय सोन कर पाये
कवय त्रोवथस कवय मँशरोवथस
हाल दिलुकुय बोज़िकुस वनु कस
आर ईतनय करतु म्योन पाये
मॉज शारिकॉय सोन कर पाये

कृष्ण भगवान

छखय पब्तुच च्युय राजि रॉनी
छय बॅखत्यन आशा चॉनी
चै हय रॅटमुच थज़रस जाये
मॉज शारिकॉय सोन कर पाये
योर कम कम चै निश वातान
योर वॉतिथ बॅखती प्रावान
लोल बरतख अथ हय श्रदाये
मॉज शारिकॉय सोन कर पाये
येछि पछि आव "सरूर" लारान
आश छस चॉन्य चैय छुय गारान
दितु र्दशुन मॅय रोज़ छाये
मॉज शारिकॉय सोन कर पाये



गूप्ययन सत्य छुय रास गिन्दान
आमय आमय कृष्ण भगवान
वन्दुहस पननुय जुव तय जान
आमय आमय कृष्ण भगवान
दन्द छिस कन्दु फॅल्य चशमु कज़ॉली
वुठ छिस रचु फॅल्य शूबान व्वज़ॉली
सिरयि चॅन्द्रमु ड्यकु छुस प्रज़लान
आमय आमय कृष्ण भगवान
रोगि रोगि वॅन्यतव अज़ कपॉर्य द्राव
दीवकी मातायि युस हबी ज़ाव
राधा गामु गामु तस छारान
आमय आमय कृष्ण भगवान
सौद्य वोन्य यछि पछि आव लारान
कॅरथस दया तय होवथस पान
टोठतम तिथय पॉढ्य छुख दयावान
आमय आमय कृष्ण भगवान

यीतनय आर

सुय छुय सारिनुय बखशन हार
अँस्य र्शण आमुत्य यीतनस आर
यस नु कांह साहितस तस सु टोठान
आमय आमय कृष्णु भगवान
टोठ अज "सरुरस" युथ फ्वलि मन
जुव जान सुय करी चैय अर्पन
शर मेति चलि ह्यम दिम वरदान
आमय आमय कृष्णु भगवान



द्वछि द्वछि लागोय पोशि अंबार ।
माता रॉगन्या यीतनय आर ॥
गुल्य गॅन्डिथ छी करान ज़ारु तु पार ।
माता रॉगन्या यीतनय आर ॥

च्यु छख ज़गतुच मॉज रखिपाल ।
आमुत्य शरन अँस्य वुछ सोन हाल ॥
गोब असि गोमुत समयुक बार ।
माता रॉगन्या यीतनय आर ॥

तुलुमुलि बूजुम छख आसान ।
सनम्वख बँखत्यन तति बासान ॥
अँन्द्य अँन्द्य नागस बोनि शैहजार ।
माता रॉगन्या यीतनय आर ॥

बॅखत्यन आश चॉन्य आयि लारान ।
दर्शनस डेडि तल अज प्रारान ॥
कारस पानय चु दिवान तार ।
माता रॉगन्या यीतनय आर ॥

सेंदि वानि छलुहय पंपोशि पाद ।
आमुत्य शरन बोज सॉनी नाद ॥
नारस फोलुराव चुय गुलजार ।
माता रॉगन्या यीतनय आर ॥

पछि चानि लारान आमुत 'सरूर' ।
आश छस चॉनी मतु ह्यतु दूर ॥
न्यंतरन लॅजमुच छस अॅश दार ।
माता रॉगन्या यीतनय आर ॥

